

宋代蜀文輯存

傅增湘編



宋代蜀文輯存

7

北京圖書館出版社

傅增湘編

目次

卷八十一 第一册	六八一
凡例	一
作者索引	一
序 傅增湘	五
序 孫鴻猷	一九
序 周玉柄	二三
讀《宋代蜀文輯存》書後 蕭方駿	二七
作者總目	三一
引用書目	五九
作者考	八五
卷十一 卷十一	一四七

第二册

卷十二——卷二十四

第三册

卷二十五——卷三十九

第四册

卷四十——卷五十四

第五册

卷五十五——卷六十九

第六册

卷七十——卷八十四

第七册

卷八十五——卷一百

續補

六八一

目次

宋代蜀文輯存卷第八十五目錄

吳昌裔 十九首

請罷史嵩之疏

論鄭清之誤國疏

論趙汝樸兄弟疏

論四都司疏

論王定等狀

論趙汝愚等狀

論安癸仲疏

論李焯狀

論項容孫轉官加職未當疏

論趙范失襄陽疏



論趙范召命不當疏

請斥安癸仲疏

論君臣濯舊圖新疏

論四陰之證狀疏

論邊防事宜疏

論三邊備禦狀

論三邊防秋狀

論本朝仁政及邊事疏

論湖北蜀西具備疏

吳昌齡

宋代蜀文輯存卷八十五目錄終

宋代蜀文輯存卷第八十五

江安傅增湘編輯

長壽孫鴻猷校訂

吳昌裔 十九首

請罷史嵩之疏 名臣奏議卷二百八十五

臣等聞之易之師曰大君有命開國承家小人勿用聖人象之曰小人勿用必亂邦也必之為辭言其決然而無可疑也臣觀自古以來必有君子而後能國未有用小人而不至於敗亡者聖人之言如金科玉條其可犯也哉臣等謹按太中大夫新除刑部尚書史嵩之習氣輕浮操心狡獪膏梁之子本無學術憑藉其伯彌遠聲勢濫魁別頭公論不容至今藉藉遊邊累年初乏善狀彌遠內專八柄之權外存三窟之勢遂以乳臭小子謬當閫寄彌遠晚年每欲引之自代師昭之心人皆知之冰山既摧嵩之知無所恃外交驍人私結和議用權槍



故智恐脅朝廷爲守祿固位之計不臣莫大焉邊方以積貯爲大命嵩之空京湖之粟以餒犬羊以博珠玉兵民苦於轉輸破蕩死徙而不恤隳人本未知中國虛實嵩之屈體事之引隳人頭目一二百人出入城府聽其節制而殊不知恥往者小使鄒伸之之遣引致王楫窺覘上都啟敵人貪婪之心貽襄蜀蹂踐之禍皆嵩之實爲之斥逐家居安享富貴在嵩之可爲幸矣而乃恃其多貲交結中外規圖復進起家而帥江右物議已自沸騰曳履而玷清班名器抑何輕褻給事洪咨夔謂近日雷雪之變皆此人所致嘗行繳駁權直院吳詠亦復見之論奏爲嵩之者合知去就矣顧乃偃然供職恬若不聞可謂小人之無忌憚者也嵩之爲人惟陛下與一二大臣謂其才可集事而天下之人皆謂其輕囂寡謀必將重至誤國此譬之惡草當芟夷蘊崇之勿使能殖可也豈宜任獨見違公論而用之乎且陛下與一二大臣必欲用嵩之者不過謂其嘗爲襄帥稍諳北人情性可以招來郭勝講解隳師而已臣等以爲不然勝之叛去父母妻

子被戮怨望已深決無可招之理彊得志而驕和議亦斷未易成嵩之近日奏疏嘗爲走弄之語矣陛下用之必無益而有害臣等聞元祐間衆賢聚朝天下駸駸向治矣時相呂大防把捉不定至用調亭之說兼用熙豐舊人進李清臣鄧溫伯而楊畏章厚蔡京之徒攀援而至其時雖以劉摯范純仁蘇轍王巖叟諸賢參錯要路不足以遏其復然之凶焰而中原之禍隨之天下安危理亂之機甚可畏也彌遠濁亂天下一十八年遺患餘禍至今不可醫治今陛下復欲用其猶子寘之文昌八座之列臣等恐其巧窺陰伺呼集非類以害君子而紹聖之禍復作矣臣等甚憂之在易內君子而外小人其卦爲泰內小人而外君子其卦爲否小人之不可近也如此臣等愚見欲望陛下特錫睿斷將嵩之刑書職任亟行褫罷以清朝列以快公論若謂時方多事未免使貪使過且乞與一在外州郡差遣少老其才以備他日邊頭任使庶合泰否內外之道謹具覺

察以聞伏候敕旨

理宗時

論鄭清之誤國疏

名臣奏議卷一百八十五

臣等惟國家之患莫大於用兵人臣之罪無加於誤國此漢武所以正王恢之誅晉穆所以行商浩之廢也臣等竊見左丞相鄭清之舊由庠序驟致顯榮涉歷迂疏智謀短淺扳援潛藩之舊冒居宰輔之司當陛下親攬萬幾聿新大化清之亦悉心輔贊隨事更張如絕苞苴斥貪佞召耆德去副封等事其於新政豈無小補特其不能度德量力保境息民妄意功名經營分表力排羣議輒啟兵端信輕銳之士以主帷幄之謀用虛驕之將以分節鉞之寄輕挑強鄰敗師河洛兵民之物故者以數十萬計糧食之陷失者以百餘萬計凡器甲舟車悉委僞境而江淮蕩然無以爲守禦之備如清之者能因一蹶之失翻爲百全之圖愛惜餘力保守舊境猶可補瘡痍之痛收桑榆之功而乃護疾弗悛私心自用但求己說之勝靡卹事力之窮復妄許於摧鋒不痛懲於覆轍繼而邳徐唐泗俱以敗聞士氣沮失國威敗喪遂使驟興遠夷得以歸曲于我始寇關蜀而

八郡爲之荼毒旋犯京襄而江面爲之繹騷以叛將召戎亂兵干紀外門內訌之孔棘左支右吾之莫能凡邊民之骸骨相枕國家之膏血無餘使陛下寒心銷志於九重之上夜不安枕至於累月者皆清之輕動干戈之罪也誤國孰大焉方今春氣向深韃騎將退正當更改規模補苴罅漏兩排和戰之論專爲守禦之謀如清之固位不去必不能盡變舊習載圖新功滯吝私心重誤國事不至於危亡不止儻或狼狽至是而後如靖康之誅王黼開禧之寬陳自強夫果何益臣等不避大譴欲乞聖慈下臣等此章示清之待其自知引退卽賜允俞以全陛下進退大臣之節以謝關蜀京湖四路之民俾繼此爲宰執者不敢輕易謀國以遺陛下之憂豈勝天下宗社之幸臣等非不知臺諫彈擊大臣往往與之俱出第臣等猥蒙親擢備數言路不敢自愛其身而爲國家忠計謹具覺

察以聞惟陛下裁斷

時理宗

論趙汝樺兄弟疏

一名臣奏議卷一百八十五

臣按本臺令諸御史臺每季專委臺官一員躬詣大理寺及應有刑獄去處點檢禁囚淹留不決或有冤濫並具當職官職位姓名以聞臣於今月二十二日恭奉詔條前往大理寺及臨安府三院錢塘仁和兩縣點檢其有事情交互囚繫淹延問駁迂迴降斷遲緩等事除已同本臺官一面申朝省外內仁和縣一項劉允中等爲趙大使宅少監位買獻平江府苗田三百餘畝又府院一項周夢庚爲寺丞大監包占常州沙田一萬四千餘畝是皆勢要貪利致獄訟淹留若非澄治其何以感召和氣臣契勘稱寺丞者即汝樺也稱大監者即汝樺也父子以驕侈而相詔兄弟以兼并而相師強奪民田不知其幾而常州一事尤駭聽聞止因游士一時無根之誤遂占平民百年有契之業爲數浩大至萬四千始令周夢庚出名陳詞後却使李天祐等交業管幹帶領兵衆以張其勢持執槍杖以示其威孀婦爲之銜冤平民爲之掩泣官吏雖知枉狀亦復飲氣奉承蓋緣是時汝樺筮蹟周行汝樺詳刑浙右氣焰熏灼莫敢誰何若非朝廷清

明政令更始奪諸暴虎還與飢鴻則晉陵之民將填于溝壑矣在法當職官吏不許請佃官田今汝樺身為王官既已犯法包占而汝樺職在風憲又敢冒嫌疑移以若所爲是不知有國法也是不知有天民也竊詳案周夢庚者當被誣告之罪而汝樺汝樺曾無豪髮之傷安坐家庭僥覲擢用將恐自是貴要觀望法禁陵夷民業不安獄訟滋起其患有甚於夷狄盜賊矣竊見汝樺兄弟以乳臭之資濟憚貪之欲依憑城社過惡頗多具見臺章未暇悉數今臣因司刑察姑擿其貪暴一事亟以奏聞欲望聖慈將汝樺汝樺特賜鑄秩罷祠永不得與親民差遣併乞行下所屬將幹人李天祐馬伯駒等同周夢庚一例定法重作施行庶幾範權要而仁困窮實所以昭陛下平明之理也謹具覺察以聞伏候勅旨

貼黃臣近又風聞汝樺有淮西提刑之命却未曾見邸吏報行若果無之豈非至幸萬一有此臣竊惑焉夫以浙西三輔之地去日甚近汝樺奉使無狀

一至于此况淮右乃風寒之處民物凋瘵而使之司臬其間將恐移浙右之害而害淮右矣又何望其執邦憲而求民瘼哉臣愚過慮欲望陛下特出睿斷明諭大臣或有進擬汝橋等新除亟賜寢罷以慰人心伏乞睿

照理宗時

論四都司疏 名臣奏議卷一百八十五

臣竊惟政府萬事之樞機宰掾諸司之綱紀故參陪機政者必先民望而彌綸省闈者多用士人在祖宗時不輕其選也前者樞臣非才備位臣已論列之矣今都曹之中先後相望有利口之覆邦家庸人之擾天下者臣敢置而不言乎謹按前戶部尚書兼檢正余鑄性資深刻言行辨堅以操切合權姦以便佞職清要出入都省蓋踰十年縱豪橫之僕以籠貨財館輕囂之賓以通關節貪遠濁亂之政鑄也實附益之大化既更舊掾盡屏鑄獨漏網出尹神京治狀無聞經營再入以沮壞人事爲任怨以寬卹民隱爲好名每於論事之間常有感舊

之意黃幹學者之宗也鑄乃謂之狠士陳宗仁林介小人之輕也鑄乃謂之好人是非良心倒置如此况能以當事任哉陛下赫然宸斷令奉祠官公論莫不稱快然不正其久據都司之罪而僅以督府之微罪行偃然家居咸謂佞罰此臣所謂利口之覆邦家者新除司農少卿兼檢正顏耆仲器能狡厲選止輕儇假借他人之文以躐世科諂事權門之子以玷班著方其分治省事遽與同列交爭暴氣鄙辭聞者貽愕朝廷不靖之風寔自耆仲倡之迨至出使淮壖不能奉宣德意而乃操聚斂之術權鹽醴之贏以微羨獻朝廷以毫末濡僚屬其臉脂膏以自潤者蓋有倍蓰于此行道之人往往能言其數進承密旨見謂叨覲糾正省務尤爲非據似聞朝廷方以財賦之任委之竊恐其力小任重才短學疏實無補於國家大計耳此臣所謂庸人之擾天下者也倉部郎中兼左司崔端純獐貌而鷲材亦一庸人也其在番陽貪鄙慘刻以小價兌會而換內庫之金以畸零折鈔而奪下戶之利以贓罰積蝕而豐囊橐之藏軍怒塞胥民怨入

骨幾於激變幸而脫歸余鑄以其能執籌算計引佐都省不務大體求詳細苛所擬文書動多積壓近者交爭相府人頗駭之豈容以冒居藁委之任哉樞密院編修官兼侍右郎官劉克莊纖能而小慧亦一利口也蚤雖能文見謂輕薄真德秀其師也平昔受知出入其門及德秀疾病則遂奔競而他往曾從龍其所主也督撫幕屬皆其所擬及上命督趣則又變其說以沮行王邁其鄉人也平時握手出示肺肝及爲臺評所點則遂拒戶而不見既背其師又誤其主又不得譽於鄉黨朋友如此至于刺探時事以聞大臣傳誦風旨以諭臺諫心術獻險人皆畏之豈可以久居編摩之選哉臣來自遠方靖共下位與四人者初無怨尤竊謂國家多事正藉宰士得人而使儉人俗吏交迭居之物論沸騰不容自嘿用敢列其姓名聞奏欲望聖慈將鑄罷祠以示利口之戒端純罷斥以彰庸人之罰耆仲姑畀外任以老其才克莊且與祠廩以奉其母庶幾宰路嚴重而政本澄清其於國論寔非小補謹具覺察以聞

理宗
時

論王定等狀

名臣奏議卷一百八十五

臣聞中興南渡留意海道之防專置帥垣實爲重寄矧狂虜猖獗擊婦窺覲正當固結民社控制水軍朝夕究圖以隄備不測則分閫置幕詎可委非其人乎臣謹按沿海制置使王定人物頑頓心術回邪因賂故相僕所而得京削因結寧海尼普而登權門出守毗陵蔑聞善狀徒以奉承貪梱之意化離賤息之姻因此薦馭持節浙右進不以正公論鄙之更化之初例叨收召方爲宰掾陰附用兵及分臺察專仇善類所幸陛下洞燭其姦亟屏于外不然端平人才一網盡矣蒙恩予郡不能導德意致之民而乃搜括見緝稱提會子民大爲擾形于嘲詩反以此欺公朝增美秩自聞易鎮之除浙東楮價爲之頓落蓋恐其移害一郡者而害一路也尙何望其任分梱而控海道乎沿海制置司主管機宜文字袁似道生稟兇暴家傳刻深方詔尹京政出子舍呢比黠吏交通賄賂估籍富民掩爲囊橐凡詔一切貪黷之政實似道附益之聖化更新兇徒盡屏汙吏